

peritum successit, qui triginta & unum annis in Imperio durans, Romæ occisus est in loco, qui vocatur ad Laurum. *Valentinianum Constantii*, & *Placidia filium natum Honorio Aug. XII.*, & *Theodosio Aug. VIII. Cofs.*, anno videlicet 418. *VI. Nonas Julii* tradit *Prosper*: *Marcellinus autem V. Nonas Julii*, anno sequenti *Monaxio*, & *Plinta Cofs. Honorius Valentiniani Patruus XVIII. Kal. Septembris Ravennæ obiit*, *Asclepiodoto*, & *Mariniano Cofs.*, anno videlicet 423. ex *Idatio*, & *Socrate*. *Theophanes* ejusdem obitum *V. Non. Septembris* consignat, *Olympiodorus VI. Kal. Septembris*. Hoc diligentissimo ejus ætatis *Scriptore*, uti *Eminentissimo Norisio* laudatur *Hist. Pelagianæ lib. 2. cap. 13.*, docemur superflite etiam tum *Honorio Valentinianum Nobilissimum dictum*. At *Cæsar nonnisi post Honorii mortem est renunciatus*, anno scilicet sequenti 424. *Prima Constitutionum eo Cæsare datarum diem præfert XVII. Kal. Novembris*, & est in *Codic. Theod. lib. 14. de Murilegis*; postrema data est anno sequenti 425. *XV. Kal. Decembris*, & que *l. ultima de Palatinis S. L. Priores autem*, in quibus *Augustus* vocatur, data sunt *III. Non. Januarii*, suntque *l. 3. de Conduct. Dom. Aug.*, *l. 23. de petitionibus*, *l. 14. de Senat.*, & *gleb. Mortuum eundem anno 455. Kal. Aprilis*, communis *Chronologorum* sententia fert. Ex his manifestum fit *Agnellum Imperii nomine Cæsarem dignitatem intellexisse*, ubi *Valentinianum* ait triginta & unum annos in Imperio durasse, ineunte enim anno trigesimo primo, collecto ab anno 424, quo ante *XVI. Octobris Cæsar* renunciatus fuerat, verè diem obiit. Cum autem id ei collatum dicitur *infanti annorum sex & quatuor mensium*, *Prosperi Chronologia* consonat, natum que indicat anno 418; *Placidia enim Kal. Januarii anni 417. potuit nuptui Constantio tradita*, decem & octo mensium spatio (quo intercedunt inter prædictam diem, & secundam *Julii 418. Valentiniani natalem*) *Honoriam primò*, inde *Valentinianum ipsum parere*; nec inde argumentum satis firmum erui posse videtur, quo *Marcellino* asserenti annum 419. *Prosperi 418. præferatur*; eo magis quia si septennis *Augustus* vocatus est post *XV. Kal. Decembris anni 425.*, & si natus fuisset secunda *Julii anni 419.*, septimus annus ab al. quot tantum mensibus capisset; verum cum septennis dicatur, de completo aptius septimo anno id videtur intelligendum. Ita conficitur *Valentinianum mortuum ætatis suæ anno 37. à præcedenti Julio* fluente, cum ab inita *Cæsarea dignitate* abissent anni triginta, cum ferè septem mensibus. *C. V. Pagius in Dissert. Hypat. ad annum 424. hæc habet*; natus erat *Valentinianus Constantio*, & *Galla Placidia Matre V. Non. Julias, Monaxio*, & *Plinta Cofs.*, inquit idem *Marcellinus*, anno nempe 419., quare vix septennis hoc anno erat. *Qui si anno 419. natus, anno 424. vix septennis? vix quinquennis fuisset, compleret enim annum quintum die secunda Julii. Veriori proinde calculo*, cum *Agnello*, & *Prospero*, sentio natum secunda *Julii anno 418. post sex annos, quartoque insuper fluente mense Valentinianum Cæsarem esse indutum*. Illud etiam observare juvat, quod quavis ex *Prosperi Chronico Galla Placidia obitus* alligetur anno 450., ex nummo tamen *Baronio* ad annum 425. n. 4. exhibitio, videtur illam diutius vitam protraxisse: cum etenim in adversa parte circa eisdem *Placidie effigiem epigraphes legatur VOTIS XXX. MULT. XXXX.* argumento, idest *Vota tricennalia ab ea cum Filio à Cæsarea dignitate colligenda, celebrasse*. *Laudatus Pagius in Prolego-*

*menis ad Dissert. Hypaticam nu. 30. nummum agnoscat in prædictis tricennalibus* cūsum, & *nihilominus Placidiam obiisse* tradit anno 450., cum tamen part. 2. ejusdem *Dissert. cap. 14. tricennalia Imperii Cæsaris Valentiniani assignet* anno 453. *Vincomalò*, & *Opitione Cofs. Planè utrumque verum esse nequit*, quòd scilicet *Placidia obierit* anno 450., & quòd 453. *tricennalia cum Filio celebravit*. *Agnellus de die mortis* scribit, mortuum videlicet *V. Kal. Decembris*; de anno autem silet. *Insanabili autem errore errat Noster ubi ait*; unoque anno *Constantius post mortem Honorii Gentibus imperavit*, morbo correptus vitales auras amisit, & reliquit filium modicum *Gallæ Valentinianum nomine*. *Constantius* nec dum septem mensibus evolutus, ut scribit *Paulus Diaconus lib. 14.*, ex hac luce subtraheus est, *Eustachio*, & *Agricola Cofs.*, anno videlicet 421. *Honorius obiit Asclepiodoto*, & *Mariniano Cofs.* anno 423.

*X. Valentinianum Romæ in Campo Martio occisum fraude Maximi Patrioci*, tradunt *Jordanes lib. 1.*, *Cassiodorus*, & *Marcellinus in Chronicis*. In *Viktoris Chronico* pro *Campo Martio*, *Campus Maximus* mendose scribitur. *Noster interemptum ait in loco, qui vocatur ad Laurum*, de quo licet sileant, qui Urbem descripsere, *Campi Martii partem quandam fuisse crediderim*. Quæ sequuntur de *Aquileja excidio præcessere Valentiniani*, adeoque *Placidia secessum*. *Cometem apparuisse Marcellinus* tradit eodem anno, quo *Bleda*, & *Attila Illyricum, Thraciamque depopulati sunt Eudoxio*, & *Dioscuro Cofs.*, anno videlicet 442. De *Ravennæ memorabili incendio* nil contigit apud quemquam *Scriptorum legere*, quare quo anno clades hujusmodi acciderit, incertum. Verum & hæc, & quæ sequuntur *divorum annorum gesta in unum fascem ternerè colligavit Agnellus*, temporum ratione neglecta. Quod pertinet ad *Ecclesias*, & *Sacella*, sive, ut *Noster loquitur*, *Monasteria à Galla Placidia magnificentissimè constructa*, ac *dedicata*, difficillimum est tempora, quibus id factum sit, definire, licet id agat *Rubeus*: quòd si *C. V. Pagii Consulatum Cæsareorum regulas* sequi luberet, & *annis consignare*, quibus vel *Valentinianus Consulatus iniret*, vel simul cum matre *tricennalia, decennalia, vel quinquennalia* habuit, aliquid lucis in re obscurissima nacti essemus: verum incerta incertis illustrare haud vacat.

*XI. Illud pro integra Familiarum Theodosii, Constantique notitia observari meretur, quod Agnellus narrat de Inscriptione in Templi S. Jo: Evangelistæ, quam vocat, Tribuna, Galla Placidia curante, posita, quamque eidem rei illustranda, ex Agnello sumpsere Viri Antiquitatis cultores. Inscriptio hæc est*: Sancto & Beatissimo Apostolo Johanni Evangelistæ Galla Placidia Augusta, cum Filio suo Placido Valentiniano Augusto, & Filia sua Justa Grata Honoraria Augusta liberationis periculo Maris Votum solvit. Filios hic Galla Placidia vides Valentinianum, & Honoriam, neminem præter eos. Mirum proinde Honorium ex Honoraria passim factum ex prava veterum lectione ab iis, qui cum postremo Imperii sui anno Honorium Augustum dicunt ob suspicionem in Gallam Placidiam præconceptam, eandem Constantinopolim ad Theodosium misissent cum filiis, horum nomina recensentes ex Librario rum vitio Honorium pro Honoraria, & Valentinianum laudant. Id quamvis Rubeus initio lib. 3. adnotaverit, neminem tamen novi, quid id curaverit ante Eminentissimum Norisium, qui ex hac Inscriptione à Rubeo accepta, & ex Olympiodoro crudi-